

Date – 03/03/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Kum 2026-2027 sorkar kum thara Mizoram sum ruahman cheng vaibelchhe 17,076 leh nuai 92 chungchang a tlangpuia sawihona vawiin khan zawhfel a ni.
2. State Information Commissioner atan IAS officer pension Dr Lalzirmawia Chhange chu vawiin khan Larsap Gen Retd VK Singh-an rinawmna thutiamtirin a la lut.
3. Prime Minister Narendra Modia chuan India chu eibar dinhmun tha tak nen khawvel beiseina mei kengtu anih chhonzawm zel a ni a ti.
4. West Asia-a inepna boruakin zual lam a pan zel.

<><><>

BUDGET

Kum 2026-2027 sorkar kum thar a Mizoram sum ruahman cheng vaibelchhe 17,076 leh nuai 92 chungchang a tlangpuia sawihona vawiin khan zawhfel a ni.

Vawiin Assembly Session-a kum 2026-2027 Budget sawihona hunah House Leader Pu Lalduhoma chuan ZPM kaihhruai sorkar chuan leiba tha chi chu a tam thei ang ber puk zel an tum rualin a tha lo chi chu tihlem zel an tum a ti a, ZPM kaihhruai sorkar hnuah Open Market Borrowing (OMB) chu kumtin a la tlahniam ziah a, hei hi sorkar tha tehna a ni lo thei lo a ti a. Capital infrastructure-a an tih that avanga sorkar laipuiin incentive tam tak an pek chu an ti tha nge tha lo tih tehna tur nia a hriat thu sawiin, an tih that leh that loh chu sorkar laipui chuan a hre chiang ber a, lawmman hmu pha state zinga Mizoram sorkar a tel chu lawmawm a tih thu a sawi a, kuminah Surplus Budget an pharh thei chu lawmawm a tih thu sawiin, a pumpuia an surplus na tur chu cheng vbc 392.99 a nih thu a sawi bawk a ni.

Pu Lalduhoma chuan tun financial year kal lai mekah COVID vanga siam SASCI atangin cheng vbc 865 leh nuai 75 bakah, incentive pali an dawng tawh a ti a , incentive dawng thei tur chuan state tin te chu fully compliance state an nih a ngai tih sawiin, sorkar laipui biak thata dawn theih chi a ni lova, an tih that avanga dawng an ni a ti a, India ram state 9 chauhin an dawn theih laia Mizoram a tel bakah India ram pumpuia 4-na a ni thei chu sorkar hnathawk te avanga a nih avangin an chungah lawmthu a sawi a ni.

Chief Minister, Finance changtu Pu Lalduhoma hian kum kal lai mek 2025-2026-a budget sum indaih lohna leh siamrem ngai dil belhna (supplementary

demand for grants) cheng vaibelchhe 3,724 leh nuai 25, sing 2 sang 7 a pharh a, a hman nghal theihna appropriation bill chu House chuan lungrual takin a pawm a ni.

<><><>

SESSION- EDUCATION

School Education Minister Dr. Vanlalhlana'n naupangten zirna tha zawk leh zawhna changkang zawk an neih theih na turin Standardized Assessment for Elementary Schools (SAfES) chu tun term tawp exam zawh tak atang khan a taka hman tan a ni a ti.

He thu hi vawiin Assembly thutkhawma zawhna leh chhanna hunah sawiin, Mizorama school hrang hranga exam zawhna level chu a inang lo hle a, zirtirtu thenkhatin lehkha phekkhanve ah te zawhna an siam a, thenkhatin blackboard-ah te an ziaak a ti a, naupangten high school an kalin zirlaite thiamna a inthlauh tawh thin em avangin Mizoram pumpuia sorkar enkawl school leh Aided school-ah te SCERT-in SafES a kalpui chu tun term tawp exam neih zawh takah khan a taka hman tan a nih thu a sawi a, a changkangin a tha hle a ti. He hmalakna hi naupangten zirna tha zawk leh zawhna changkang zawk an neih theih na tura ti an ni a ti a, nakkum atang chuan pawl 3 atanga pawl 8 thleng kalpui an tum a, MBSE pawhin pawl 9-ah standard question an pek chhuah dawn tih a sawi a ni.

Minister chuan Samagra Shiksha hnuai thawktu atan Cluster Resource Centre-ah 15, Block Resource Centre (BRC)-ah14, District Project Office-ah 53, State Project Office-ah 32 lak an ni tawh a, an zinga 2 chu Advertisement lak niin, ZPM sorkar hnua lak an nih thu House a hrilh a ni.

<><><>

ZEMABAWK W LC ELECTION NOTICE

Aizawla Zemabawk West Local Council din thar atana inthlan hun tur chu March ni 25 a nih thu vawiin khan State Election Commission chuan a puang a.

Seat 5 awmna Zembawk West Local Council inthlana chuh tum te tan tun thla ni 9 thleng hun hawn a ni a, ni 10 ah hming thehluhte endik a ni a, inhnukdawk duh te tan ni 12 thleng hun hawn a ni ang.

Vote thlak ni ni 25 ah hian vote thlak zawh velah vote tla te chhiar nghal tur a ni ang.

Kan corr thudawn danin, Zemabawk West Local Council hi nikum June ni 25- a Zemabawk Local Council atanga din a ni AMC chuan an order hi hman theih rih loh - kept abeyance a dahin inthlan theih a ni lo a, thlahlui Feb ni 26 khan an order hi siam tha in Local Council an lo din tawh hi a ti nung leh a inthlan theih ani ta a ni.

<><><>

SIC SWORN IN

State Information Commissioner atan IAS officer pension Dr Lalzirmawia Chhangte chu vawiin khan Larsap Gen Retd VK Singh-an rinawmna thutiamtirin a la lut.

Lakluh inkhawm hi Lok Bhawan ah neih niin Chief Minister Pu Lalduhoma, Speaker Pu Lalbiakzama leh official dang te an tel a ni.

Dr Lalzirmawia Chhangte hian State Information Commissioner post 2 zinga pakhat a luah anga, IIS officer pension Pu Mangjangam Touthang nen State Information Commissioner an ni dun dawn a ni.

Pu Lalzirmawia Chhangte hian kum 1991 May ni 30 khan Mizoram Civil Service zawmin, December ni 3, 2019 khan Indian Administrative Service (IAS) ah hlankai niin, AGMUT Cadre 2009 ah a awm a. Mizoram Sawrkar hnuai Department hrang hrangah Secretary dinhmun a chelh hnuah Commerce & Industries Department-a Commissioner hna a chelh lain August ni 31, 2025 khan superannuation pension-in a chhuak a ni.

<><><>

LUNGLEI CHAPCHAR KUT EXHIBITION

Lungleia Saikuti Hall-ah Chapchar Kut Exhibition — State Handloom Expo Hathkargha Mela chu vawiin khan hawn a ni a

National Handloom Development Programme (NHDP) hnuai ZOHANDCO leh sorkar laipui Ministry of Textiles Development Commissioner (Handloom) țang kawp huaihawt a ni a, chawlhkar hnih a hawng ang.

Exhibition hawngtu ZOHANDCO Chairman Pu JK Dawngzuala chuan tun tuma exhibition buatsaih hi Lunglei tan liau liauva a hranpaa dil chhuah a nih thu sawiin, ZOHANDCO hna ber chu kut themthiamte leh puan tahtute puih a nih thu a sawi a, an kutchhuak siamna leh hralhnaah ZOHANDCO chuan hma lakpuiin, kawng a dapsak thin tih a sawi a. Puan tahtute tan ZOHANDCO Office, Aizawlah Yarn Depot siam a nih thu leh man tlawm zawkin puan tahna tur lahlum pek chhuah thin a nih thu sawiin, South Khawbung leh Thenzawlah te Yarn Depot hi dah belh tum a nih thu a sawi a ni.

Lunglei Saikuti Hall-a March ni 3–13 chhung aw h tur Chapchar Kut Exhibition — State Handloom Expo 2026-ah hian puan dawr 60 hawn niin, he'ng dawrahte hian Mizoram hmun hrang hrang atangin tualchhuak puan leh thawmhnaw lam bakah, kut themthiam thil siamte man tlawm zawkin zawrh chhuah a ni a. Ei leh in zawrhna dawr 5 hawn tel a ni bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

WORLD HEARING DAY

Ri Hriatna Ni (World Hearing Day) chu National Health Mission buatsaihin vawiin khan Aizawlah hman a ni a, Mizoram-a an hman vawi 11-na a ni.

He hun hi Persons with Disabilities (PWD) Commissioner Pi Vanlaldikin a hmanpui a, naupang te beng ri hriatna a that leh that loh uluk zawka thlithlai tura inenkawl na tha pek tih thupui hmanga inzirtirna hun hman a ni.

WHO-in a zirchianna ah ri hriatna thalo hi mihring thil hriatna 5 zinga piansualna-ah a tam ber a. Tunah hian khawvel pum pui-ah mihring tluklehdingawn 1 leh a chanve vel hian ri hriatna chaklo an nei a, heng zinga maktaduai 430-te chu an beng a ngawng a, tun ang zela a kal chho anih chuan kum 2050 ah chuan mi 10 ah 1 zel chu an beng a ngawng dawna chhut a ni. Hetiang anih avang hian beng enkawl uluka, bengngawna thlentu hrang hrang lakah inven fimkhur a ngai hle a. Beng natna chi hrang hrang bakah damdawi beng ri hriatna chaklo thlen thei lakah te leh ri bengchheng nasa lakah te inthiarfihlim a pawimawh a ni.

He mi kawnga hma la tur hian National Programme for Prevention and Control of Deafness (NPPCD) chu kum 2014, August thla atang khan Mizoramah pawh National Health Mission hnuaiah din tan a ni a. Kumin thlenga chhinchhiah danin Mizoramah beng lama insawiseln a nei mi 31,735 lai en niin beng natna emaw beng ri hriatna thalo nei mi 4,750 hmuhchhuah tawh an ni a, mi 222 chu beng thalo vanga zai an ni tawhbawk. Hei bakah hian mi 1,541 chu bengdar dawng tur leh Speech Therapy tul ang te ti tura refer an ni a.

><><>

MADA FREE CLINIC

Mizoram AYUSH Doctors Association (MADA) chuan Baktawng khua-ah a thlawna hriselna inentirna a buatsaih a. Baktawng leh a chhehvel khuaa hriselna lama harsatna nei mi 200 vel an inentir a ni.

He Free Clinic ah hian AYUSH doctor 25 leh State Medicinal Plants Board (SMPB) leh MSACS atangin mi engemawzat an kal a. Mipui hriselna an enfiah bakah a thlawnin damdawi an sem nghal a, thisen test chi hrang hrang a thlawn leh man tlawm zawkin damlo mamawh te tan tihsak bawk a ni.

Baktawng Village Council-in Free clinic buatsaih tute a lo dawngsawng a ni. Inentir hun hawn hma hian hriselna kawnga mipuite inzirtirna hun hman niin ramhmul damdawi chungchang zirtirna neih a ni bawk.

Mizoram AYUSH Doctors Association chuan hetiang ang mipui tana rawngbawl na hi hmun hla zawkahte pawh chhunzawm zel an tum thu an sawi a, Mizoram mipuite hriselna kawngah theihtawp chhuah zel an tum thu an tarlang a ni.

<><><>

PM

Prime Minister Narendra Modia chuan India chu eibar dinhmun tha tak nen khawvel beiseina mei kengtu anih chhunzawm zel a ni a ti. Vawiina Post-budget webinar ah he thu hi sawiin Pu Modia chuan India chu khawvel tana beiseina eng pe tu anih thu sawiin eibar zawngna kawnga chak taka hmasawngna chuan Viksit Bharat hmahlir tihhlawhtinna kawngah a lung pawimawh tak anih thu a sawi a ni. Pu Modia chuan khawvel ramten thilsiamchhuahna kawnga rintlak leh inghahna tlak thawhpui tur an zawng reng a ti a. Hemi kawngah hian India chuan dinhmun pawimawh tak a chang chho mek a ni a ti bawk.

Vawiin Webinar thupui hi Eibar zawna tlo leh chak zawka tihhmasawn tih hman a ni a. Pu Modia hian sawrkarin eibar dinhmun hmasawna tura insiamthatna a kalpui tam tak a tarlang a. Heng zingah hian boruak ti chhe tlem zawnga technology hmante, MSME lama insiamthatnate leh inkalpawhna lama hmasawna hrang hrangte a tarlang a ni.

<><><>

WEST ASIA

West Asia-a inepna boruakin zual lam a pan zel a. Vawiin khan Iran leh Israel-US sipaite hi ahma aia nasa in missile leh drone hmangin an inkap leh a. Thudawn danin Israel sipaite chuan a rualin Iran khawpui Tehran leh Lebanon khawpui Beirut an kap a. Israel Defence Force (IDF) te chuan an sipaiten Lebanon chhim lamah beihpui an thlak mek a, hmalam pan turin ramri hmun hrang hrangah tanhmun an insiam tih an sawi a. Israel sipaite chuan Hezbollah pawl ho inkhuarna hmun pawimawhte an kap a ti a. Hezbollah te hian Iran puiin Israel an kap ve niin an puh a ni.

<><><>